



*RIU a hala atras pa
AGF pero*

**Mester
cumpli cu
pago pa haya
Radisson
definitivo**

Lesá A3

RIU a hala atras pa AGF pero

Mester cumpli cu pago pa haya Radisson definitivo

ORANJESTAD - Despues di un 'tiki intermediacion di terciernan' e cadena di hotel RIU a hala atras pa asina Aruba Growth Fund (AGF) y Carlson Group, doño di Radisson, por reanuda negociacion riba e compra di e hotel na Palm Beach. Primordialmente e ta un cuestion di placa: si AGF cumpli cu cierto pago, na juli e hotel lo ta di nan.

Esey Bon Dia Aruba ta comprende di abogado Doris Canwood, representando Carlson Group. Awe e sentencia tabata planea den e caso di AGF contra Carlson unda e grupo di inversionista local a pidi hues pa para e benta pa RIU y obliga Carlson pa sinta bek na mesa cu nan. Pero ayera a sali na cla cu e partidonan conhuntamente a pidi hues pa warda cu su decision. AGF mes no a pidi pa un fecha final, pero Carlson si kier un veredicto mas tarda diamars, 23 di juni. Pa asina e presion keda riba e proceso di benta. Awe hues lo dicidi si e lo honra e petition y hala e fecha di senten-

cia.

Ainda no tin 'done deal'
Abogado no kier papia di un 'done deal ainda', pero si ta admiti cu e partidonan ta leu den e negociacion. "Pero mi ta cauteloso pa bisa cu ya tin algo. Mester warda un rato awor, pone e puntanan riba e i y wak ta kico realmente ta bay pasa. Nos no tin un "done deal" tanten no tin e pago." E partidonan si a haya otro riba e puntanan principal Hopi cu tabata un 'problema' biaha pasa, sra. Canwood ta bisa, 'awor a keda resolvi den un forma satisfactorio pa Carlson'. AGF mester cumpli tambe cu cierto pagonan (suma di garantia) riba 23 di juni. Y despues ta sigui pe final di e caminda cu a cuminsa september aña pasa, locual ta yama e 'closing'. Ta spera cu por finalisa e benta na comienso di juli.

Placa

Papiando cu e abogado, a bira hopi cla cu e factor mas importante ta e placa. Basicamente si 7 luna pasa AGF a cumpli cu esaki, awe e hotel tabata bendi caba, asina e ta expresa. Durante e trata-



mento di e caso den corte dos siman pasa, AGF mes a informa cu un di e motibonan di e tardanza, tabata cu e partidonan no a haya otro riba e prijs. E grupo local a pidi pa Carlson baha e prijs y finalmente na april e aña aki a logra un acuerdo. Sinembargo na mei, manera conoci, Carlson a drenta negociacion cu RIU, cu si a cumpli cu cierto pago y asina e partidonan aki a logra di cera un acuerdo den menos cu 2 siman. AGF a protesta, bisando cu placa nunca tabata y ta e problema y Carlson a actua di mala fe.

RIU retira

Despues e caso sumario di AGF riba 1 di juni unda Carlson a priminti hues pa warda cu e ehecucion di e acuerdo di benta cu RIU, poco, poco e partidonan a cuminsa papia cu otro bek. Siman pasa esaki a haya un push grandi, ora RIU a expresa cu si Carlson lo yega un acuerdo cu AGF, nan lo retira. Carlson y RIU a palabra tambe cu esaki lo keda sin consecuencia negativo pa ambos. Mirando e obligacionnan legal, stipula den e acuerdo cu nan a firma riba 22 di mei pa RIU cum-

pra hotel Radisson. E acuerdo ainda ta keda valido y den e caso AGF no ta cumpli cu pago y otro condicionnan, e benta cu RIU ta sigui, abogado Canwood a bisa. "Carlson no tin preferencia, e kier djs bende."

Di parti di AGF, René Kan a bisa Bon Dia Aruba ayera cu nan no por contesta pregunta. Minister di Turismo, Otmar Oduber, tabata e prome ayera mainta pa informa prensa riba e desaroyo nobo pa cu e benta di Radisson: "Gobierno a pone su posicion bon cla na tur partido envolvi y esaki a pone partidonan bay bek mesa." E minister tabata hopi envolvi den e caso aki pasobra e/gobierno kier para e expansion di all-inclusive na Aruba. Dialuna minister Oduber tabata den parlamento pa splica entre otro riba e cambionan legislativo y tambe su plan pa un maneho.

Di parti di RIU, Bon Dia Aruba no a logra di haya un comentario y asina tampoco keda sin informacion riba su motibo pa hala atras den e proceso di benta di hotel Radisson. □

Minister Otmar Oduber:

Acuerdo di principio entre Aruba Growth Fund y Carlson Group

Diamars mainta Minister Otmar Oduber a duna e noticia cu Carlson Group a tuma e decision di sinta na mesa cu Aruba Growth Fund pa asina purba yega na un final pa loke ta e compra di Radisson Hotel.

Minister Otmar Oduber a haci hopi cla na tur e partidonan cu ta envolvi,

e posicion cu Gobierno tin y e maneho basa riba interes general, cu no ta desea un All-inclusive na Radisson. Pa e ultimo 2 simannan a comprende cu tur e partidonan tabata na mesa y hopi ta e combersacionnan cu a tuma lugá.

Minister a haya notificacion dialuna atardi cu Carlson Group ta sintando

na mesa cu Aruba Growth Fund un biaha mas y cu un acuerdo di principio a wordo firma tambe. Den e cuadro aki a dirigi un carta cu sosten di tur e partidonan envolvi den e caso den corte caminda ta haci un apelacion na hues pa pospone e veredicto cu mester a tuma lugá diaranson. Kier pospone esaki te cu dia 23 proximo, dunando e partidonan e posibilidad

pa yega na un acuerdo definitivo durante e siman aki.

Sr. Oduber a bisa "Esaki sigur ta trece un tranquilidad temporal pa nos comunidad. Ora bo ta un partner cu ta respeta otro, ta duna espacio tambe pa por dialoga, pa percura pa e maneho cu ta pone bo dilanti, ta na beneficio di comunidad di Aruba." □